

重印大理府志

昆明顧視高
署籤



重印大理府舊志緣起

大理府舊轄七州縣清康熙二十九年通判黃公年通判黃公
張公泰交纂修府志凡四載而告成鋟板諸存咸豐丙辰全燬
於兵燹書亦行就散佚文獻不足識者憾焉鎮圭蚤歲治生商
業未嘗學問然性好文翰且留心地方掌故樂與鄉里績學相
周旋泊壯游會川昆明以及航上海走齊魯幽燕所至均幸得
事其大夫之賢者友其士之仁者朝夕觀摩愈知國學之可寶
貴丙子倦游返里漸將業務委諸兒輩壹意圖維公益恭敬梓
桑於整理倉儲河流橋梁道路外既捐資提倡各級教育復創
辦蒼逸圖書民衆教育等館又子珍圖書室隨延聘名宿修輯
邑志甫經采訪深感舊志無徵舉凡地理之沿革政治之得失
風俗之升降文化之盛衰與夫戶口物產田賦關樞之損益今
昔攸殊幾無從以資考鏡因廣爲徵訪此舊府志求之數年僅

獲六冊繼更旁搜博採百計營求歷二年始又獲二冊全璧斯
得欣慶不可言喻意者鬼神呵護不使前人精心結撰有關政
俗之宏編鉅製終就沈淪耶亟輸國幣萬元鉛印三百部以廣
流傳從此七屬徵文考獻得所依據啓發後進功用良多固不
徒彰先輩之美也民國二十九年歲次庚辰中秋史城嚴鎮圭
謹識於蒼逸寄廬

大理府志序

滇通志既成之三年大理郡志適亦告竣郡刺史以序請余
顧遐荒圖籍漸至修明因樂得而序之案滇省在京師西南
萬里而大理又在滇省迤西九百里與永昌接鄰永昌乃犬
牙錯出外地大理則翼帶脅臨誠西陲之極邊矣夫西陲極
邊一旦而文獻足徵紀載有備豈非國家聲教之廣暨司牧
政化之漸摩也乎大理古稱葉榆若漢若唐蒙據段擾外連
吐蕃內損將士宋窺前失畫大渡河爲界元創業之初越金
沙江而獵一爲所棄一借以興中間機官有難置議至明之
傅穎川藍永昌沐西平宣威略地不下蜀漢之武鄉唐之忠
武衛國以故終明之世箐蠻邊彝戢兵絕釁鉦鼓無聞揆厥
所繇控御得人撫綏有法何慮金齒繡面不安衣冠禮儀之
俗哉我

皇清肇造區夏討平寇逆之後問郡邑之賦役版籍無存問閭閻
之五經四子不備又何志乘之云有自我

皇上軫念殘黎

恩綸渙澤累年積逋疊行蠲免荒服窮髮無不擊壤載歌陶唐
重見豈獨大理一郡也哉今大理志成往復披覽疆域則東
而若水西而黑水南有鐵柱北有鐵橋山川則點蒼雞足九
鼎昆彌西洱漾濞金沙蘭滄城郭樓觀則擴羊苴之故址仍
五華之麗譙人物寓公則溯盛張之餘韻想升菴之流風其
古今之因革官師之更替以及賦稅祠祀兵制險隘科名里
俗食貨戶口營建興廢罔不條分縷析犁然粲然爰取前明
嘉靖間李中谿楊弘山兩先生所纂舊志參觀之往者既該
其要來者復著其詳凡舊志未輯百有餘年之事一一畢具
裒然三十卷之多將與通志並垂永久通志紀其略茲志紀

其全不圖遐荒文獻遂至若此之盛者然余於此竊有進焉
聖代輻員之廣聲教之遠固已駕漢軼唐而文化弘敷梯航賓服
無遠弗屆者豈不以人哉卽以大理論郡在滇省西陲之極
邊一旦而衣冠文物彬彬丕變亦十餘年來賢有司之恪守
功令潔己愛民勤加勸恤始得農耕於野士習於庠吾願後之臨
蒞茲郡者尚其思致此之繇各砥礪教養於前之未及者及
之前之未洽者洽之安知後之視今不信盛也哉

康熙三十三年歲次甲戌春三月穀旦

總督雲南貴州等處地方軍務兼理糧餉兵部右侍郎兼都察
院右副都御史加四級今陞都察院左都御史瀋陽范承勳
序

大理府志序

滇迤之西稱山水之勝者莫過於大理東有若水九巖南有
昆彌鐵柱雲龍黑水扼其西鐵橋石門鎮其北一雄郡也夫
郡必有志郡而有志所以載山川列土田編人民勒政事使
採風者觀之瞭若指掌則郡之不可缺志也明矣大理有舊
志纂於洪武時趙良彥迨嘉靖間李元陽復修之似乎前志
已備今日可無作也雖然天地之氣運每與國家之教化相
關稽大理在三代時不過一荒服耳楚始略地漢置益州逮
其後李特據之於晉蒙氏據之於唐段氏據之於宋其間豕
突狶奔叛服常有元雖立上下二萬戶設防送十二關而生
齒未盛明甫改路爲府置隸州縣法制非不燦設然求如今
日之車書一統盡入版圖戶口殷繁化行俗美誠自洪濛以
來未之或有也蓋我

皇上德婉義黃治臻堯舜文教既周乎宇內武功復振夫遐荒故自吳逆掃除以後教養畢舉滇之民亦既離水火而登衽席矣茲復廣沛

皇恩積貯恤荒蠲糧豁賦滇之父老子弟靡不交相慶曰吾儕小人今幸生熙皞之世得以優焉游焉家勤稼穡戶誦詩書歌豐年而罕萑苻之驚聆鄉約而知孝悌之義民安物阜庶績咸熙豈非太平之景運也耶當此之時使不有以志之非所以揚厲休風廣歌盛世也矧前志迄於今百有餘年矣其中因革損益不無異宜輕重簡繁不無殊尚而且忠臣孝子未盡咸登土俗民風未能悉載任斯土者苟聽其記述無聞文獻凋謝不幾貽弇鄙之譏歟我

國家右文崇道百度維新康熙二十九年

命纂修通志而於大理之形勝已載其略矣不知一省之志不妨

其略而一郡之志必欲其詳猶夫作史之有大綱小目而條貫之不可缺一也云爾而謂大理郡乘修之其可已乎

制軍范公與余同志癸酉秋爰委大理府通判黃元治董其事越甲戌春志成請序於余余閱是志喜其有明通之識而不患於雷同具敏斷之才而實足以傳信且考其山川按其圖記是又足以黼黻乎卿雲而芒耀於化日覩斯志也直與卷阿江漢同流而還視昔人蒐羅記載廣輯舊聞亦云大備矣太史之輶軒樂府之演雅猶將採之而豈徒光昭於一郡已乎嗣是政治之暇間嘗披圖展卷不禁畢然高望曰於山懷點蒼雞足之勝於水愛洱海榆河之深於星野知天文井鬼之宿於疆域覩南詔都會之雄弔古蹟而興寄登臨考人物而望深遙集農桑殷富學校崇巍戶誦家絃風移俗易猗歟休哉荒陬邊徼之區幾與中州文物相埒要非我

聖天子神謨廣運盛德覃敷亦安能有如是之休養生息涵煦於
光華復旦之中也哉余故曰天地之氣運每與

國家之教化相關也是爲之序

康熙三十三年歲次甲戌春三月穀旦

巡撫雲南兼建昌畢節等處地方贊理軍務兼督川貴兵餉都
察院右副都御史加十級廣寧王繼文序

大理府志序

志之昉也肇於禹貢職方續於水樞地里然禹貢詳於土賦
產貢而略於人民周官職方詳於戶籍多寡而略於風俗管
子水樞備列六國然其解大都在乎水班氏統列十三國然
其旨大都係乎土詳歟略歟然歟否歟顧第弗深考它若稗
官小史諸家撫拾或錄此遺彼或得偏失全考疆索按輿圖
者有遺憾焉甚矣志之不可或闕也

今上御極之二十有九年詔在廷諸臣纂修一統志雲南制軍范
撫軍王以及藩臬諸公凜承

意旨纂修通志維茲大理踞金碧上游擅西南巨鎮蒙段之都
會唐宋之理亂係焉是烏可以無志哉舊有郡志若元李景
山明王景常殘帙雖存僅同外編荒史至郡人侍御李中谿
元陽先後纂修之編經丙戌兵燹灰燼無餘矣徵求舊刻僅

得斷簡而上之誠闕典哉壬申同制軍范巡視金沙江還
師大理因以郡志修輯爲請制軍深然之而特慮秉筆者
之難其人也余曰郡通判黃子元治會議是舉盍委諸制
軍曰可爰檄府舉行會黃子以署篆去浪穹迨癸酉春始旋
郡適大理守李斯佺亦以是春至余促之乃檄七屬捐金設
局請以黃子執牛耳太和令張泰交副之於是表沿革別疆
域審經制詳物土核人品采藝文謬者正之訛者訂之複者
去之闕者增之嘉靖以前移易刪改必期於簡丙戌以後采
擇訪核不嫌於詳旣參以學士之傳聞復證以里老之覩記
而又本之以天理裁之以民彝進退取舍斟酌經年濡筆抽
思稿凡幾易而後脫黃子心手亦瘁矣書成余得以卒讀焉
紀沿革則編年序蒼峯則尊中論孝義則並提忠烈述人物
則力表遺賢發幽光昭法戒豈猶是呂覽之靡雜而淮南之

表詭者哉余竊嘆曰郡之志猶國之史以秩王章以嚴治紀以明物則以正人倫於茲賴焉是集也誠繼禹貢職方之未備而融水樞地里之拘牽者也抑補緝通志之嚴簡而光昭一統之赫弈者也余韜鈴是問組織未嫻敢以質語弁諸篇端而爲後起者告云

康熙三十二年歲次癸酉嘉平月吉

和碩額駙加一級提督雲南總兵官右都督加一級紀錄八次
瀋陽諾穆圖克俊父謹識

大理府志序

大理漢葉榆地唐大曆初閣羅鳳築羊苴咩城卽此在會城之西八百九十里離

京師則九千九十里也是滇爲西南徼外而大理又居徼外迤西其關嶺地勢更加險峻領州四縣三長官司一雖越此極邊尚有永昌鶴慶永寧麗江然西南則臨緬甸西北則近吐蕃大理適踞列郡之脊爲阨塞要區以故唐貞元間閣羅鳳之孫異牟尋苦吐蕃侵擾表請內附西川節度使韋皋與尋會師繇此進克七城焚百五十堡斬獲無算今我

國家特命重帥開轅郡城控制其地亦相度便宜收效臂指之意也蓋大理固全滇重郡而山川人物又甲於十七郡如點蒼雞足昆彌三崇之幽邃崕峙西洱漾濞金沙蘭滄之淳泓澎湃漢有盛覽張叔之文學晉有龐遺之義唐有段宗勝之忠

明有楊南金之骨鯁楊士雲之清介趙汝濂之剛毅李元陽
李東艾自修之理學於是鍾靈積習風氣樸茂倍於他郡今
井畝勤乎耕織庠序勉乎誦誦里社敦乎禮讓科第聯翩孝
義接踵誰謂荒服教育不同中夏也哉按明舊志一纂於洪
武再纂於嘉靖三修於萬曆凡前代之治亂撫馭罔不依據
史冊考信撫實條分縷晰備極觀覽至後百數十年闕焉未
續又迭遭兵燹版片殘燬卽故家收藏一二遺帙皆軼蠹不
全康熙三十年適

制府范大司馬奉

命巡視金沙江回駐節榆城紳士呈請纂修乃

提軍諾公首爲倡蠲七屬賢有司咸期圖籍之明備也踵躍
蠲俸開局集工敦延博雅蒐彙訪歷三年始克成書余展
卷卒讀見夫明之末造流寇蹂踐傷堵禦之無人士官暴強

慨懷柔之失術逮我

王師擴疆討叛兩度經畫興革損益一一宣布恩信田野闢歲時豐兵民洽土俗恬儲備裕萑苻消鰥寡恤箐谷寧且也

皇仁普徧連沛蠲免文教覃敷漸摩聲化擊壤之歌實繇薰絃之被西南萬里一道同風從古大一統之盛有如我

聖皇者哉至於民生國計編中之孰得孰失或善或否一一具在後之官茲土者倘思久安長治上抒

天子邊陲之憂覽是編而審量取擇因時制宜未始不爲循良之助勿徒作文字觀也

康熙三十三年歲次甲戌仲秋吉日

雲南等處承宣布政使司布政使加四級錦水于三賢謹題於五華山麓

大理府志序

余自銓曹出藩滇西於甲戌閏五月甫抵大理郡守李君卽以志序請余曰葉榆遠在荒徼自漢始通中國迨唐宋間蒙氏段氏竊踞茲土將七八百年其英流傑士麗藻奇文淪於彝俗廢於榛莽者何可勝道今一旦郡志告成起衰救弊返雅還淳彬彬乎爲一代大觀余雖未董其事而樂觀成書何敢以不文辭未幾郡通判黃涵齋復持書請余序余因得博覽而縱觀焉夫葉榆爲南詔都會北接吐蕃西南通交緬點蒼雞足雄峙於中黑水金沙聯絡於外前撫昆彌則崇岡峻壁鳥道羊腸誠有一夫當關萬夫莫開之勢右聯金齒左帶麗江則番彝雜處藉其力足以強獲其利足以富以故酋長之雄乘間竊取戰中國之兵疲天下之力而莫可誰何迨我朝定鼎兩經掃蕩置大帥設重兵誠有見於茲地險要視他郡爲